

## 22. Liturgie

### 22.1 RAPPORT DEPUTATE VIR LITURGIESE SANG (Artt.48, 118)

- A. Ds. A.H. Mulder stel die Rapport.
- B. Enkele melodieë is van prof. Henk Temmingh ontvang. Die Kommissie moet hieraan aandag gee.
- C. **Besluit:** Die Rapport word verwys na Kommissie Liturgies 1.
- D. Ds. J.H. Cilliers stel die Kommissierapport.

#### E. RAPPORT

##### 1. Opdrag

Acta 1997:771, 4.1.1-4.1.4:

- 1.1.1 Om die harmonisasies van Pss. 38, 49, 54, 60, 74 en 87 deur 'n kundige persoon te laat verander ter verbetering van die gemeentesang
- 1.1.2 versoek kundige persoon om melodieë wat hoog lê, laer te transponeer, te wete Pss. 38, 103, 106, 143 en Sbs. 6.14 en 16.2
- 1.1.3 soek en versoek komponiste om alternatiewe vir melodieë in 3.5 genoem, te komponeer betyds vir die Agenda van Sinode 2000
- 1.1.4 'n Lys van alternatiewe melodieë vir gebruik in kerke moet so gou moontlik in 'n meer bevatlike en vereenvoudigde formaat (afkortings liefs uitgeskryf), aan al die kerke gestuur word vir gebruik.

**Besluit:** Kennis geneem.

##### 2. Sake waarvan die Sinode kan kennis neem

###### 2.1 Werkwyse

- 2.1.1 U Deputate het op 19/2/1998 en op 27/5/1999 vergader.
- 2.1.2 Opdrag 4.1.1. 'n Kundige persoon is in ds. Arnold Mulder gevind wat alreeds alternatiewe harmonisasies vir die betrokke melodieë gereed gemaak het. Hulle word as 'n bylae by hierdie Rapport aangeheg (Bylae A).
- 2.1.3 Opdrag 4.1.2. Die transponerings is gedoen en is reeds in die nuutste Psalmboek opgeneem.
- 2.1.4 Opdrag 4.1.3 Nadat 'n versoek in *Die Kerkblad* geplaas is dat nuutgekomponeerde melodieë vir Psalms 17, 39, 44, 52, 55, 56, 57, 58, 109, 120, 129, 142 en Sb. 17, 20, 35 ingewag word, het twee lidmate gereageer. Weens sekere redes, wat aan die betrokkenes meegedeel is, kon die Deputate nie van hulle melodieë gebruik maak nie. Professionele komponiste is nie genader nie weens finansiële implikasies. Prof. Henk Temming het egter onderneem om te werk aan die bogenoemde Psalms met 1976 melodieë, nl. Ps. 44, 120 en 129, maar hy wil nie aan die Geneefse melodieë verander of alternatiewe daarvoor aanbied nie. Sy werk word by hierdie Rapport aangeheg (Bylae B). Die 1937-melodieë van Psalms 120 en 142 kan ook as alternatiewe gebruik word.
- 2.1.5 Opdrag 4.1.4. Die lys van alternatiewe melodieë wat deur die 1997 Sinode goedgekeur is word reeds in die nuutste Psalmboek aangetoon. 'n Volledige lys plus 'n aantal geskikte Gesangmelodieë word deurgestuur vir plasing in *Die Kerkblad*.

**Besluit:** Kennis geneem.

##### 3. Sake waarvoor die Sinode moet besluit

- 3.1 Keur die harmonisasie van ds. Arnold Mulder vir Pss. 38, 49, 54, 60, 74 en 87 goed (Bylae A).

**Besluit:** Goedgekeur.

- 3.2 Keur die transponerings van Pss. 38, 103, 106, 143 en Sb. 16.2 goed.

**Besluit:** Goedgekeur.

- 3.2.1 Behou die bestaande melodieë van Pss. 17, 39, 52, 55, 56, 57, 58, 109 en 142 so, met die 1937-melodieë as alternatiewe vir Pss. 120 en 142.

**Besluit:** Goedgekeur.

- 3.2.2 Keur die nuutgekomponeerde melodieë van ds. A.H. Mulder en prof. H. Temmingh vir Pss. 44, 120 en 129 goed.

**Besluit:** Goedgekeur.

##### 4. Aanbevelings

- 4.1 Benoem weer Deputate vir Liturgiese Sang.

**Besluit:** Goedgekeur.

## 22.2 RAPPORT NUWE SKRIF- EN PSALMBERYMINGS EN HERSIENING TOTIUSTEKS (Artt.49, 122, 160, 218, 219, 228, 253)

- A. Dr. A.G.S. Venter stel die Rapport.
- B. Oudl. D.F. du Toit hou die werk van wyle prof. P.W. Buys met betrekking tot die hersiening van die Totius-Psalmbundel voor.
- C. **Besluit:** Die Rapport word verwys na Kommissie Liturgies 2. Finansiële aspekte word verwys na Kommissie vir Finansies.
- D. Di. A.L. Coetzer en G.C. Verhoef stel die Kommissierapporte.

### E. RAPPORT

#### 1. Opdrag

Acta 1997:784-788 en 792.

Die opdrag aan hierdie Deputate behels vier sake, nl.

- nuwe Skrifberymings;
- nuwe Psalmberymings;
- hersiening van die Totiusteks;
- uitgee van nuwe liederebundel.

**Besluit:** Kennis geneem.

#### 2. Nuwe Skrifberymings

##### 2.1 Opdrag

Acta 1997:784, 785.

- 2.1.1 Die Sinode benoem Deputate om enige beryming van die Skrif wat aan hulle voorgelê word of ander berymings wat hulle mag identifiseer volgens die vasgestelde Beginsels en Riglyne (Acta 1994:527) te beoordeel en aanbevelings daarvoor te doen.
- 2.1.2 Die Sinode neem kennis dat min reaksie uit die kerkverband gekom het van voorleggings van nuwe berymings en beveel die kerke aan om persone met belangstelling in hierdie rigting aan te moedig om berymings aan die Deputate voor te lê.
- 2.1.3 Die nuwe Deputate kry opdrag om Skrifgedeeltes (bv. die gebede in Efesiërs 1 en 3; Num 21:17 e.v. en die lied in 1 Sam 2) wat vir moontlike Skrifberymings geskik is, te identifiseer en met individuele persone te skakel met die versoek om Skrifberymings oor hierdie gedeeltes aan die Deputate voor te lê. Sodanige persone moet op hoogte gebring word van die vereistes waaraan 'n Skrifberyming moet beantwoord volgens die besluite van Sinode 1994.
- 2.1.4 Die Deputate kan, binne die neergelegde riglyne en met die samewerking van eksegete (soos wat die prosedure is met die nuwe Psalmberyming), met die betrokke persone kommunikeer aangaande veranderinge aan die voorgelegde berymings sodat die persoon 'n finale produk aan die Deputate kan voorlê. Hierdie finale berymings moet aan die volgende Sinode voorgelê word vir finale beoordeling. Die Skrifberymings van J.P. Bingle en die ritmiserings van A. Verhoef word terugverwys na die opstellers met die versoek om aandag te gee aan voorgestelde wysigings en die werk weer voor te lê aan die Deputate vir afhandeling.
- 2.1.5 Die Deputate moet ritmiserings oorweeg en die volgende Sinode daarvoor adviseer. Dit sluit ook die ritmiserings van A. Verhoef in.

**Besluit:** Kennis geneem.

##### 2.2 Sake waarvan die Sinode kennis moet neem

- 2.2.1 Ds. J.P. Bingle het op versoek van die Deputate 'n artikel in *Die Kerkblad* gepubliseer om lidmate aan te moedig om nuwe Skrifberymings aan die Deputate voor te lê en hulle in te lig oor die behoefte aan en die vereistes vir nuwe Skrifberymings. In hierdie artikel is gewys op Skrifgedeeltes uit die Ou en Nuwe Testament wat deur die Deputate geïdentifiseer is as moontlik geskik vir berymings (omdigtings). Die Deputate het ook spesifieke persone genader met die versoek om omdigtings te doen. Min reaksie is op hierdie versoeke ontvang.

- 2.2.2 Die werkswyse wat gevolg is, was om 'n sub-kommissie van die Deputate aan te wys wat die voorleggings nagegaan het en voorstelle tot verandering aan die omdigters voor te lê. Die gewysigde voorleggings is telkens nagegaan totdat daar wedersydse tevredenheid was dat die omdigting aan die gestelde vereistes voldoen. Belangrike kriteria was telkens dat die Skrifgedeelte se inhoud en bedoeling omgedig moet word, dat die woord-toon verhouding sodanig moet wees dat die belangrike begrippe musikaal beklemtoon moet word, dat die omdigting esteties afgerond moet wees en in gemaklike, waardige, hedendaagse Afrikaans moet wees. Die gepastheid van die melodie is ook verreken.
- 2.2.3 Die Deputate het die omdigtings van J.P. Bingle van Jes 43:1-7 en Ef 6:10-20 afgehandel. Hierdie omdigtings is in die nuutste uitgawe van die Psalmboek as twee nuwe Skrifbelymings opgeneem. Dit is gepas om met groot waardering van die werk van ds. J.P. Bingle kennis te neem aangesien daar baie werk en tyd nodig is om omdigtings te doen en af te handel.
- 2.2.4 Omdigtings is ontvang van P.W. Buys (Hab 3:2-19), J.P. Bingle (Eks 15:1b-18), S. Lessing (1 Kron 16:7-36), Cobie Steyn (Rom 11:33-36; Deut 32:1-42). Nadat die omdigtings deur die Deputate ondersoek is, is in die lig van die bestaande beginsels bevind dat die omdigting van J.P. Bingle van Eks 15:1b-18 wel vir liturgiese gebruik geskik kan wees. Hierdie omdigting word vir goedkeuring aan die Sinode voorgelê en as 'n Bylae by hierdie Rapport aangeheg.
- 2.2.5 Die hele saak van *ritmiserings* is deur die Deputate ondersoek. Die Deputate het in ag geneem dat daar wel bruikbare ritmiserings in gebruik is waaronder die beryming van die Ons Vader-gebed in Skrifbelyming 28b die bekendste is. Die volgende probleme met ritmiserings is deur die Deputate geïdentifiseer:
- 2.2.5.1 Die probleem met die ritmiserings wat deur die Deputate ondersoek is, lê nie primêr in die gehalte van die ritmiserings nie. Die probleem is eerder dat die gedeeltes wat geritmiseer word, nie poëties van aard is nie. Dit bring mee dat die prosateks se estetiese waarde verlore gaan met noodgedwone ongemaklike woordorde en woordgebruik, weglating van lidwoorde of die dubbelnegatief, onnatuurlike weglating van lettergrepe en klanksametrekkings en die gebruik van verouderde vorme.
- 2.2.5.2 Prosateks word in die streng struktuur van bestaande melodieë ingepas. Hierdie melodieë vra meestal kort frases, dikwels met sesure in die middel van reëls en definitiewe sesure aan die einde van reëls. Indien die prosateks in hierdie vorm gegiet word, kom dit dikwels afgekap en kripties voor omdat minder belangrike woorde soms moet weggelaat word ter wille van die musikale patroon.
- 2.2.5.3 Die volgende riglyne vir aanvaarbare ritmisering behoort te geld:
- \* Dit moet 'n toonsetting wees waarin die musiek die woorde volg en nie andersom nie.
  - \* Dit moet 'n aantreklike en gemaklike verhouding tussen taalkonstruksie en musiek hê.
  - \* Dit moet verkieslik 'n gedeelte wees waarin die woorde van die gelowige vertolk word en nie waar die woorde van God aan die gelowige(s) beskryf word nie.
- 2.2.5.4 In die lig van bostaande het die Deputate geoordeel dat die voorgelegde ritmiserings van A. Verhoef nie aan hierdie kriteria beantwoord nie. Sy is dienooreenkomstig in kennis gestel.
- 2.2.6 Na aanleiding van 'n omdigting deur L. Dekker van Sondag 1 van die Heidelbergse Kategismus wat aan die Deputate voorgelê is, is besin of dit deel is van die Deputate se opdrag (Acta 1997:785) om ook sodanige liedere te beoordeel, aangesien die "berymings van die Skrif" streng gesproke die opdrag is. Dit is in ag geneem dat die beryming van die 12 Artikels (Skb. 27) die beryming van 'n Belydenis bevat. Die Deputate het besluit om wel hieroor te besin en die volgende bevindinge aan die Sinode vir oorweging voor te lê: (Die volledige ondersoek word as Bylae aangeheg).
- 2.2.6.1 Dit kan histories aangedui word dat die dogmatiese lied in die vierde eeu 'n belangrike rol gespeel het in die weerlegging van dwaalleer. Die Ariane het hulle afwykende beskouings aangaande Christus en die grondliggende leer oor die drie-enigheid van God uitgedra deur middel van metriese, strofiese gedigte van groot poëtiese skoonheid en melodieë in die Griekse volkstyl. Hierop het Chrisostomos geantwoord met regsinnige liedere, in dieselfde styl gesing, maar waarvan die inhoud die suiwere belydenis bevat het in die lig van die Skrifopenbaring van die Persoon van Christus en die drie-enigheid van God. So het talle Christologiese en trinitariese liedere in die kerk tot stand gekom waarin die dogma van die

kerk gedra is. Hierdie dogmatiese liedere het dus 'n verkondigende karakter gedra omdat dit die Skrifwaarheid dra en dien.

- 2.2.6.2 'n Regsinnige dogmatiese lied kan ook 'n *skriftuurlike* of *skrifmatige* lied genoem word omdat dit op die openbaring van die Skrif berus en die geformuleerde dogma van die kerk verwoord. Die Godsopenbaring en die belydenis daarvan as 'n Skrifwaarheid (dogma) is die bron van die dogmatiese lied. Dit is daarom 'n belangrike aanbiddingswyse waarin die Skrifwaarheid bely, beantwoord en geaktualiseer word.
- 2.2.6.3 Sodanige dogmatiese liedere kan 'n sterk middel wees om die Gereformeerde belydenis in die lewens van mense in te dra en deel van hulle bestaan te maak, juis omdat die lied 'n sterk medium is wat in die gedagtes van mense posvat en by hulle bly.
- 2.2.6.4 In die beoordeling van die aanvaarbaarheid van 'n dogmatiese lied moet dieselfde kriteria geld as vir omdigtings van die Skrif ("Skrifberymings") om te toets dat daar nie van die waarheid van die Skrif afgewyk word nie en dat die melodie by die inhoud pas.
- 2.2.7 Op uitnodiging het di. J.P. Bingle en A.H. Mulder ook sitting geneem op die Gesangekommissie om saam te werk met die oog op die vind van moontlike nuwe Skrifberymings. Die werk van hierdie Gesangekommissie sal D.V. voor die Sinode 2003 afgehandel wees.
- 2.2.8 Die melodieë en hulle singbaarheid was vir die Deputate 'n hoë prioriteit. Die goedgekeurde omdigtings asook die ander voorleggings het telkens van bestaande melodieë gebruik gemaak.

**Besluit:** Kennis geneem.

### 2.3 *Sake waaroor die Sinode moet besluit*

- 2.3.1 Keur die omdigting van J.P. Bingle van Eks 15:1b-18 goed.

**Besluit:** Goedgekeur.

- 2.3.2 Gee aan die nuwe Deputate opdrag om nuwe Skrifberymings (omdigtings) te probeer vind en na ontvangs te beoordeel volgens die reeds goedgekeurde prosedures en aan die volgende Sinode voor te lê. Die Sinode versoek lidmate om nuwe voorleggings aan die Deputate deur te stuur.

**Besluit:** Goedgekeur.

- 2.3.3 Besluit oor die gebruik van ritmiserings en keur die riglyne vir ritmiserings soos in pt. 2.2.5.3 geformuleer, goed. Die nuwe Deputate kan dan alle ingekome ritmiserings in die lig hiervan beoordeel en aanbevole ritmiserings aan die volgende Sinode vir goedkeuring voorlê.

**Besluit:** Goedgekeur.

- 2.3.4 Gee aan die Deputate die mandaat om met die Gesangekommissie van die Ned. Geref. Kerk en Herv. Kerk saam te werk met die oog op die vind van moontlike nuwe Skrifberymings. Die Deputate moet die volgende Sinode adviseer oor die bevindinge hieroor.

**Besluit:** Goedgekeur.

- 2.3.5 Keur die riglyne oor die dogmatiese lied goed en dra dit aan die nuwe Deputate op om die moontlikheid en kriteria van sodanige liedere in die kerke bekend te stel en om ingekome dogmatiese liedere te beoordeel en die volgende Sinode daarvoor te adviseer.

**Besluit:** Die nuwe Deputate vir die Sinode in 2003:

- 1) Moet sê wat presies onder dogmatiese liedere verstaan word
- 2) Moet sê watter kriteria sal geld by die beoordeling van dogmatiese liedere
- 3) 'n Meer indringende historiese agtergrond ten opsigte van die dogmatiese lied gee.

#### Motivering:

1. Die deputate het na analogie van die bestaande dogmatiese lied, SB 27, tereg die saak van 'n dogmatiese lied (beryming van HK, Sondag 1) wat op hulle pad gekom het, aan die Sinode voorgelê.
2. Die kommissie het tereg voorlopige inligting oor die dogmatiese lied onder die aandag van die Sinode gebring.

### 3. Nuwe Psalmberyming

#### 3.1 Opdrag

Acta 1997:787, 788.

**Besluit:** Kennis geneem.

#### 3.2 *Sake waarvan die Sinode moet kennis neem*

3.2.1 Die volgende persone het namens die Gereformeerde Kerke meegewerk aan die werk van die Afrikaanse Psalmkommissie: proff. H.F. van Rooy, Heilna du Plooy, P.A. Roodt, di. J.P. Bingle en A.H. Mulder. Die ander kerke wat op hierdie Psalmkommissie dien, is die Ned. Geref. Kerk, Ned. Herv. Kerk, Verenigende Geref. Kerk en Afrikaanse Protestantse Kerk.

#### 3.2.2 Vordering met die werk

3.2.2.1 Tot op datum (3 Mei 1999) is 78 omdigtings finaal goedgekeur. Die oorgrote aantal is gedoen deur prof. T.T. Cloete met enkeles deur ander persone. Die ontbrekende Psalms is in die proses van bewerking. Tans is 32 in die proses van finale afhandeling en aan die oorblywende 40 word gewerk.

3.2.2.2 'n Bietjie meer as die helfte van die bestaande melodieë word behou omdat hulle ingang by die gemeentes gevind het. Vir die ander Psalms is al 'n hele aantal nuwe melodieë gekomponeer.

3.2.2.3 'n Redaksiekommissie is reeds aan die werk om die tekste van die nuwe omdigtings wat goedgekeur is, taalkundig te versorg. Eweneens is 'n Redaksiekommissie aangewys wat gevorder is met die bepaling van al die musikale aspekte van die tekste wat nuwe melodieë kry, die wyse van notasie, van harmonisasie, die uitleg van die boek wat die gemeente in die hand kry en van die begeleiersboek vir die orreliste. Die onkoste van hierdie werk word deur die uitgewer N.G. Kerk-Uitgewers gedra.

3.2.2.4 Die teikendatum vir die gereed wees van die manuskrip word gestel op April 2000 indien niks onvoorsiens voorval nie. Daarna moet die afrondingwerk nog gedoen word. Dit lei daartoe dat die ander kerke beoog om Pinkster 2001 die nuwe Psalmboek te publiseer (saam met die nuwe Gesangeboek wat saamgestel word).

3.2.2.5 Vir die inligting van die Sinode word van die omdigtings as voorbeelde by hierdie Rapport as 'n Bylae aangeheg.

3.2.2.6 Die Deputate het nog nie die keurderspaneel saamgestel nie omdat die Psalms waarmee gewerk is, nog nie in so 'n vorm was dat dit aan sodanige paneel voorgelê kon word nie en omdat 'n groot aantal van die persone op die vertreklys (wat die Sinode voorgestel het) in elk geval by die huidige proses betrokke is.

**Besluit:** Kennis geneem.

#### 3.3 *Sake waaroor die Sinode moet besluit*

3.3.1 Gaan voort met die samewerking met die ander kerke tot met die afhandeling van die Nuwe Beryming.

3.3.2 Benoem weer Deputate en benoem die volle Deputategroep as keurderspaneel. Die finale Rapport moet voor die Sinode 2003 deur die Deputate aan die Sinode voorgelê word vir finale besluit oor die inhoud van die Nuwe Beryming.

**Besluit:** Goedgekeur.

3.3.3 Die Sinode spreek hom gunstig uit oor die *proses* van die nuwe beryming van die Psalms.

#### *Motivering*

Gesien in die lig van die Deputate se eenstemmige rapport oor die deeglike werk vir die nuwe Psalmberyming.

**Besluit:** Goedgekeur.

3.3.4 Die nuwe Psalmberymings word aan die kerke beskikbaar gestel vir beoordeling en kommentaar aan die nuwe Deputate.

**Besluit:** Goedgekeur.

3.3.5 Die nuwe Deputate ondersoek die beste opsie (waarvolgens die nuwe Psalmberyming aan die kerke beskikbaar gestel kan word) vir beoordeling.

**Besluit:** Goedgekeur.

3.3.6 Die Deputate vat die kommentaar saam en doen 'n aanbeveling by Sinode 2003.

**Besluit:** Goedgekeur.

3.3.7 Die Sinode rig 'n brief van dank en waardering aan prof. T.T. Cloete vir sy werk met die Psalmomdigtings, en 'n woord van dank word gerig aan die ander medewerkers en die Deputate vir die werk wat hulle tot nou toe gedoen het. Die seën van die Here word hulle toegebied op hulle werksaamhede wat wag.

**Besluit:** Goedgekeur.

#### **4. Hersiening van Totiusteks**

##### 4.1 *Opdrag*

Acta 1997:792.

**Besluit:** Kennis geneem.

##### 4.2 *Sake waarvan die Sinode moet kennis neem*

4.2.1 Die Sinode het besluit om prof. P.W. Buys te nader om sy werk in hierdie verband voort te sit en om ook die bundel van Skrifbelymings deur te gaan.

4.2.2 Prof. Buys sal hieroor afsonderlik aan die Sinode rapporteer – (Aanvullende Agenda).

4.2.3 Geen versoeke tot samewerking van ander kerke in hierdie verband is ontvang nie.

**Besluit:** Kennis geneem.

##### 4.3 *Sake waarvoor die Sinode moet besluit*

4.3.1 Die Sinode besluit in die lig van prof. Buys se Rapport op welke wyse met hierdie werk voortgegaan moet word.

4.3.2 Sinode 2003 oordeel oor die hersiene Totiusteks

4.3.3 Die proses vóór Sinode 2003 verloop soos volg:

4.3.3.1 Die Deputate vir Psalmberyming kontroleer die teks vir Skrifgetrouheid, leerstellige suiwerheid, musikaliteit, taalkundigheid en liturgiese bruikbaarheid.

4.3.3.2 Die Administratiewe Buro stel 'n Proefbundeltjie (slapband, nootlose boekie) op die goedkoopste manier aan elke kerk beskikbaar vir kommentaar aan die nuwe Deputate.

4.3.3.3 Die Deputate vat die kommentaar saam en doen 'n aanbeveling by Sinode 2003.

4.3.4 Die aanvanklike fondse vir die bundeltjie word voorgeskiet en word dan verhaal uit die verkope daarvan aan die kerke.

4.3.5 Die Sinode neem met dankbaarheid teenoor die Here kennis van die monumentale werk van wyle prof. P.W. Buys en die medewerkers word ook bedank vir die ywer en liefde waarop hulle hierdie werk gedoen het.

**Besluit:** Kennis geneem.

#### **5. Uitgee van nuwe liederebundel**

##### 5.1 *Opdrag*

Acta 1997:787.

**Besluit:** Kennis geneem.

##### 5.2 *Sake waarvan die Sinode kennis moet neem*

5.2.1 Die TKKP is saamgestel om die Nuwe Sangbundel saam te stel en met 'n uitgewer te onderhandel oor die uitgee van 'n Nuwe Sangbundel. Die Afrikaanse Psalmkommissie funksioneer as 'n sub-kommissie van die TKKP en berei die teks van die Psalmbundel voor. Al die kerke wat op die Afrikaanse Psalmkommissie dien, het ook sitting op die TKKP. Die TKKP koördineer die kerke se besluite oor die uitgee van die Nuwe Liederebundels deur met die uitgewer te onderhandel. Die GKSA is uiteraard slegs in soverre betrokke as wat die druk en uitgee van Psalms en Skrifbelymings ter sprake is, terwyl die TKKP ook oor die uitgee van die Gesangebundel handel.

5.2.2 Die uitgewer is die NG Kerk-Uitgewers. Hierdie firma is 'n vereniging ingelyf sonder winsoogmerk ingevolge artikel 21 van die Maatskappywet. Die uitgewer staan tans in vir onkoste wat noodsaaklik is vir die administrasie om die proses van voorbereiding te laat voortgaan. Die kopiereg op die nuwe Psalmberymings behoort aan die NG Kerk-Uitgewers.

5.2.3 Elke deelnemende kerk in die TKKP sluit 'n selfstandige ooreenkoms met die uitgewers oor die druk, bestuur en bemaking van individuele sangbundels en die tantieme daaraan

verbonde word onafhanklik bestuur volgens die verkope van die betrokke kerk se sangbundel. Elke kerk se sangbundel kry dus 'n eie ISBN-nommer. 'n Uitgewersooreenkoms, wat as standaard vir die deelnemende kerke voorberei is, word as Bylae by hierdie Rapport aangeheg. Dit sal 'n ooreenkoms tussen die GKSA en die uitgewer wees en moet na goedkeuring namens die GKSA onderteken word. Die ooreenkoms is deurgegee aan die Regsdeputate vir advies aan die Sinode.

- 5.2.4 Aangesien die TKKP geen regspersoon is en nie die administratiewe vermoë het om kopiereg te handhaaf nie, is ooreengekom dat die Kopiereg van die Nuwe Psalmberyming by die Uitgewer vestig.
- 5.2.5 Die koste van die nuwe bundel sal uiteraard afhang van die formaat daarvan. Die Sinode sal moet besluit oor die saamstel van die nuwe Psalmboek. Die volgende alternatiewe bestaan:
- \* Die Nuwe Psalmberyming van al 150 Psalms word as 'n afsonderlike bundel uitgegee naas die bestaande "Totiusberyming"
  - \* Die Ou en Nuwe Berymings van al 150 Psalms word beide saam in een bundel uitgegee met die twee berymings bymekaar by elke Psalm.
- 5.2.6 Die Deputate wil die Sinode daarop wys dat dit onwettig is om eie liederebundels saam te stel uit Psalms, Gesange of ander gepubliseerde liederes of om dit op 'n elektroniese bord te vertoon indien die kopiereg-vereistes nie nagekom word nie. Die prosedure wat kerkrade en instansies moet volg ten einde die kopiereg-vereistes na te kom, sal in oorleg met die NG Kerk-Uitgewers aan die Sinode voorgelê word.
- 5.2.7 Dit is gewens dat iemand met kennis van kontrakte die saak van die GKSA op die TKKP behartig.

**Besluit:** Kennis geneem.

### 5.3 *Sake waaroor die Sinode moet besluit*

- 5.3.1 Benoem twee afgevaardigdes om die GKSA op die TKKP te verteenwoordig (en minstens een behoort 'n regsgeleerde te wees).

**Besluit:** Goedgekeur.

- 5.3.2 Besin oor die uitgewersooreenkoms met die NG Kerk-Uitgewers met die oog op die uitgee van 'n sangbundel van die GKSA.

**Besluit:** Die Uitgewersooreenkoms met die NG Kerk-Uitgewers word goedgekeur. Die volgende punt word in die Ooreenkoms opgeneem: "Die outeursreg van die Totiusteks (Psalms en Skrifberymings) behoort steeds aan die Administratiewe Buro". Die betekenis hiervan is: Daar moet dus nog steeds by die Administratiewe Buro toestemming verkry word indien enige van die Totiusberymings in 'n nuwe bundel opgeneem word.

- 5.3.3 Besluit oor die inhoud en formaat van 'n nuwe liederebundel in die lig van die alternatiewe genoem onder punt 5.2.5 sodat die Sinode 2003 'n finale besluit hieroor kan neem.

**Besluit:**

1. Die nuwe Deputate ondersoek die moontlikheid van *een* bundel.
2. Sinode 2003 neem 'n finale besluit oor die inhoud en formaat van die nuwe liederebundel.

- 5.3.4 Doen 'n ernstige beroep op kerkrade om die kopiereg te handhaaf in die gebruik van liederebundels en/of elektroniese borde.

**Besluit:** Goedgekeur.

- 5.3.5 Die Deputate vir Regsaangeleenthede gee advies aan kerkrade oor kopiereg – spesifiek oor liederebundels en ander publikasies waarop kopiereg van toepassing is.

**Besluit:** Goedgekeur.

## 6. Aanbevelings

- 6.1 Besluit oor elke onderafdeling hierbo genoem.

**Besluit:** Kennis geneem.

- 6.2 Begroot vir uitgawes in die lig van die aangehegte begroting.

**Besluit:** Kennis geneem.

6.3 Benoem weer Deputate met die volgende opdrag:

6.3.1 Gaan voort om met die ander kerke op die Afrikaanse Psalmkommissie saam te werk in die daarstel van 'n Nuwe Psalmberyming. Die finale kopie moet aan die Sinode 2003 voorgelê word vir beoordeling.

**Besluit:** Goedgekeur.

6.3.2 Probeer om nuwe Skrifberymings (insluitende goedgekeurde ritmiserings) te vind en te ontvang en volgens die reeds bestaande prosedures te behandel en aan die Sinode 2003 voor te lê.

**Besluit:** Goedgekeur.

6.3.3 Werk met die TKKP saam en onderhandel verder binne die ooreenkoms met die NG Kerk-Uitgewers, in oorleg met die Bestuur van die Administratiewe Buro, met die oog op 'n finale kwotasie vir die uitgee van 'n eventuele nuwe Liederebundel.

**Besluit:** Goedgekeur.

## 7. Begroting

Vertrekpunte van hierdie begroting:

- Die Nuwe Liederebundel sal op die Sinode 2003 afgehandel wees en hierdie Deputate se opdrag sal dan afgehandel wees.
- Die Afrikaanse Psalmkommissie sal nog tot April 2001 funksioneer.
- Die TKKP sal nog tot Januarie 2003 noodsaaklike onderhandelinge moet voer.

### BEGROTING 2000 – 2003

#### 1. Vergaderings van die Deputate

##### 1.1 Vergadering van volle Deputate te Potchefstroom

Reiskoste vir 2 vergaderings (aan die begin in 2000 en aan die einde in Mei 2002 – tussenin word van telefoonkonferensies gebruik gemaak - indien nodig)

2 x 1200 km. = 2400 km

1 Vliegtuigkaartjie vanaf Oos-Londen

##### 1.2 Vergadering van sub-kommissie oor Skrifberymings en Totiusteks te Potchefstroom

Reiskoste vir vergaderings in Augustus 2000 en April en Augustus 2001

3 x 600 km = 1800 km

#### 2. Vergaderings van die Afrikaanse Psalmkommissie

##### 2.1 Vergaderings van volle kommissie te Pretoria

Vergaderings in Junie en Desember 2000 en April 2001

3 x 800 km = 2400 km

Aanbied as gasheer van een vergadering: R3000

##### 2.2 Vergaderings van kleiner kommissie te Pretoria

Vergaderings in Maart en Augustus 2000 en Februarie 2001

3 x 500 km = 1500 km

##### 2.3 Vergaderings van die Gesangekommissie te Pretoria

Vergaderings in April en September 2000 en Februarie 2001

3 x 420 km = 1260 km

**Besluit:** Die begroting vir reiskoste tot 30 Junie 2000 word deur die Bestuur van die Administratiewe Buro goedgekeur. 'n Nuwe begroting tot 30 Junie 2001 moet voor 30 April 2000 ingehandig word.

## F. AANVULLENDE RAPPORT

### 1. Opdrag

Acta 1997:792.

“4. Opdrag aan die te benoeme Deputate



- 4.1 Aan die te benoeme Deputate word opgedra om waar moontlik ligte redaksionele veranderinge in die Totiusteks aan te bring. Moeilik-verstaanbare woorde, argaïsmes en Afrikaans-vreemde woorde kan by wyse van verklarende aantekeninge (soos in die 1983-Bybelvertaling) verduidelik word.
- 4.2 Die werk wat reeds in hierdie verband gedoen is, word in ag geneem en sover moontlik oorgeneem.
- 4.3 Die huidige bundel van Skrifberyminge word ook bewerk.”

Prof. P.W. Buys het met die hulp van gekoöpteerde helpers<sup>1</sup> hierdie opdrag enkele dae voor sy oorlye voltooi. Die omvang van die werk is 14 330 versreëls.

Die keuse van die Sinode om hom vir hierdie taak aan te wys, is ryklik beloon. As uitmuntende digter en geskoolde teoloog het hy die opdrag met die grootste piëteit, noukeurigheid, en uitstekende digterlike ingewings uitgevoer.

Totius het die kerkliedtradisie en die voorafgaande psalmberymings die “ou goud” van die verlede genoem, en sy beryming daarby laat aansluit. Vanweë die hoë agting wat P.W. Buys vir die werk van Totius gehad het, toon hierdie hersiening aanvoeling en deernis teenoor ‘n teks wat op hierdie eeu-oue tradisie voortbou. Op sy beurt het hy homself nie tussenin laat kom nie, maar by die idioom van die teks probeer bly. Hierdeur het die eenheid van die bundel bewaar gebly.

Daar is soos volg te werk gegaan: prof. Buys het ‘n eerste deurlopende hersiening geloods. Dié dokument is deur sy helpers deurgewerk waarna hulle voorstelle en kommentaar ingelewer het. Hierdie werk is deur hom geëvalueer, en waar hy dit goed genoeg bevind het, gebruik, aangepas, of soms as ‘n prikkel vir verdere skepping benut. Hierdie laaste lesing waarby hy die gekoöpteerdes se werk geïnkorporeer het, word hiermee aan die Sinode voorgelê.

Daar is deurgaans gehou by die bestaande rymskemas, die jambiese en trogeïese ritmiese patrone en veral die “gesalfde styl” waarin die omdigtings oorspronklik gedoen is. Hieruit volg die voordeel dat die geredigeerde teks, indien dit aanvaar word, onmiddellik gebruik kan word met dieselfde melodieë wat tans in die kerke gesing word.

Binne hierdie parameters is gepoog om te werk aan enersyds **woordgebruik**, d.w.s. dat plaasvervangers gesoek is vir Afrikaans-vreemde woorde, wat ook insluit argaïsmes, woorde uit “vreemde” tale en gedwonge woordskeppings, soos in die opdrag aangedui. Andersyds was dit nodig dat onnatuurlike **woordorde en sinsbou** ook nader gebring word aan hedendaagse taalgebruik. Totius self was op sy beurt al aangewese om by die bekende ou melodieë te bly. Omdat hierdie ou bekende melodieë oorspronklik vir die fleksierike Frans, Duits en Nederlands gekomponeer is, moes baie aanpassings in Afrikaans gedoen word.

Dit was egter nie haalbaar om binne die beperking van “ligte redaksionele veranderinge” alles binne die teks reg te stel nie. Die *Woordverklarings* wat prof. Buys geformuleer en as alfabetiese lys aan die einde aangeheg het, moet daarvoor vergoed. Woorde en uitdrukkings wat in die lys voorkom, is vir doeleindes van die voorlegging met ‘n asterisk aangedui. Hy het egter nie voorsien dat die asterisk-tekens permanent aangetoon moet word nie, omdat dit die teks ontsier en onderbreek.

Verder is die gedeeltes in die teks wat verander is, deur **vet druk** uitgelig, ook net ter wille van die voorlegging, vir die gerief van die afgevaardigdes. Die doel was geensins dat vetdruk in ‘n nuwe Psalmboek gebruik moet word nie.

**Besluit:** Kennis geneem.

## 2. Sake waaroor die Sinode moet besluit

2.1 Die Sinode aanvaar die geredigeerde teks van die Psalm en Skrifberymings.

2.2 Indien die voorgelegde hersiene teks aanvaar word, ontvang die betrokke Deputate opdrag om met die drukwerk voort te gaan sodat dit in die kerke gebruik kan word.

- i) Prof. Buys is oorlede voordat hy die Rapport kon finaliseer. Wat hier volg is opgestel deur diegene wat deur hom gekoöpteer is vir die uitvoering van die opdrag.
- ii) Dr. ILJ van Vuuren, mev. Sielie Laubscher, DF du Toit, Mione du Toit en Mietsie Harman.

**Besluit:**

- 3. Die Hersiene Totiusteks word ter wille van kostebesparing nie in die Handeling van Sinode 2000 opgeneem nie.

22.3 **BESWAARSKRIF : KLASSIS JOHANNESBURG TEEN BESLUIT NASIONALE SINODE 1997, ART. 23.6 OOR MOONTLIKE UITBREIDING VAN KO, ART. 69 (Artt.136, 252)**

22.4 **BESWAARSKRIF VAN PARTIKULIERE SINODE NOORD-TRANSVAAL TEEN BESLUIT NASIONALE SINODE 1913 EN 1997 OOR LITURGIESE LIEDERE EN 'N VERSOEK AS KONSEKWENSIE (Artt.137, 252)**

- A. Ds. G.N.V. Botha stel die Beswaarskrif.
- B. Dr. N.P. Heystek stel die Beswaarskrif.
- C. **Besluit:** Beide die Beswaarskrif en Beswaarskrif word verwys na die Kommissie Liturgies 1.
- D. Ds. J.H Cilliers stel die Kommissierapport.

**E. BESWAARSKRIF**

Hiermee word beswaar aangeteken teen die besluit van Nasionale Sinode 1997:809, 23.6 oor moontlike uitbreiding van KO, art. 69.

**1. Die besluit waarteen beswaar gemaak word, lui soos volg**

Daar word nie gevolg gegee aan die Beskrywingspunt nie.

Motivering: Die liedere wat die Here ons in sy Woord gegee het (dit sluit berymde en te berymde OT en NT liedere in) is vir gebruik in die kerke die beste en voldoende.

- 2. Die Nasionale Sinode 2000 word versoek om bogenoemde besluit te herroep en opnuut die Beskrywingspunt van die Suidelike Partikuliere Sinode (Acta 1997:807-809) ter tafel te neem.

**3. Beswaargrond 1**

Die Nasionale Sinode gaan in sy motivering nie voldoende in op die eksegetiese en praktiese beredenering van die Beskrywingspunt nie.

**Motivering**

- 3.1 Die Beskrywingspunt motiveer deeglik die versoek tot wysiging (oor die noodsaaklikheid van die voorgestelde wysiging). Die Nasionale Sinode spreek hieroor slegs 'n ongemotiveerde waardeoordeel uit.
- 3.2 Eksegese van die Here se Woord, wat deur 'n Partikuliere Sinode getoets is en wat handel oor die belangrikste Skrifgegewens oor hierdie saak, word in die Beskrywingspunt as motivering gegee (808, 1.4). Die Nasionale Sinode wys egter die Beskrywingspunt van die hand sonder om enige beredenering tot die teendeel uit die Skrif aan te toon.
- 3.3 Die Beskrywingspunt maak duidelik in 1.4 onderskeid tussen
  - a) Wat die Skrif oor die sing van liedere in die kerk leer (vgl. die verwysing na Ef 5:19; Kol 3:16)
  - b) Die feit dat liedere in die Skrif voorkom (vgl. die verwysing o.a. na Filip 2:6-11).

Die Sinode swyg egter geheel en al oor a) hierbo, en bevestig bloot die status quo.

Hiermee kom die beginsel van 2 Tim 3:16 ("Die hele Skrif is deur God geïnspireer en het groot waarde om in die waarheid te onderrig, dwaling te bestry, verkeerdhede reg te stel en 'n regte lewenswyse te kweek") in gedrang.

- 3.4 Die Nasionale Sinode gee geen motivering uit die Belydenis en die Kerkorde self nie.
- 3.5 Die Beskrywingspunt wys op, en beredeneer, inkonsekwentheid, praktiese onhoudbaarheid en eensydigheid in die bestaande praktyk (vgl. 1.2, 1.3, 1.5, 1.6). Sonder dat enige beredenering

blyk, word hierdie motivering egter afgewys of geïgnoreer deur te stel dat die bestaande praktyk voldoende is.

- 3.6 In die Gereformeerde Kerke regeer Christus as Hoof van die kerk sy liggaam deur sy Woord (Ef 4:15). Wat Christus in sy Woord beveel, is bepalend. Die stem van die Here, en nie die stem van die meerderheid of van 'n Sinode nie (kollegialisme) moet gehoor word. Daarom is duidelike Skrifbegronning nodig.
- 3.7 Daar is juis nou 'n groeiende behoefte in plaaslike kerke aan groter duidelikheid op grond van die Here se Woord oor die kerklike praktyk. Ernstige debatte hieroor is in die GKSA aan die gang. Hierdie feit plaas 'n groot verantwoordelikheid op die Nasionale Sinode om behoorlike advies en grondige beredenering volgens God se Woord te gee (vgl. KO, art. 86), veral met die oog op die bevordering van die beleving van kerklike eenheid in die besluitneming deur kerklike vergaderings.

## **F. BESWAARSKRIF**

### **1. Besluite waarteen beswaar gemaak word**

- 1.1 Besluit Nasionale Sinode 1913:104 en 45 (art. 134)

“Daarenteen kan aangevoerd word dat “in de kerken” (zoals de D K O het uitdrukt) of “of de openbare godsdienst” (zoals onze synodale bepaling het noemt) alleen ..... gezongen worden .... De gezangen waarvan de tekst in Gods Woord staat uitgedrukt”.

De Synode in behandeling genomen hebbende het Kommissie Rapport re kerkgezing, besluit dat rapport goed te keuren met byvoeging van de Twaalf Artikel de Geloofs”.

- 1.2 Besluit Nasionale Sinode 1997:809, 23.6

“Daar word nie gevolg gegee aan die Beskrywingspunt nie.

Motivering: Die liedere wat die Here ons in sy Woord gegee het (dit sluit die berymde en te berymde OT en NT liedere in) is vir gebruik in die kerke die beste en voldoende.

### **2. Gronde vir die beswaar**

- 2.1 Teen besluit Nasionale Sinode 1913

- 2.1.1 Die Sinode weerspreek homself deur enersyds as beginsel te aanvaar dat slegs “gezangen” gesing mag word waarvan die (volledige) “tekst in Gods Woord staat”, maar andersyds tog die Twaalf Artikels as (belydenis) lied vir erediensgebruik goed te keur (vgl. die voorstel dr. S.O. Los – Praeses, 1913:45, 134.2 wat hierdie teenstrydigheid aanwys).
- 2.1.2 Voorgenoemde teenspraak wat ontstaan het, is waarskynlik daaruit te verklaar dat Sinode twee onversoenbare pole wou harmoniseer, naamlik: 'n Belydenis (goedgekeurde homologia=nasê van die Skrif) wat deur die eeue in die liedereboek van die Christelike kerk opgeneem is (vgl. :104 bo) en andersyds 'n sogenaamde “beginsel” dat slegs liedere gesing mag word waarvan die volledige teks in die Skrif te vind is. Dus slegs Skrifberymings (w.o. Psalmberymings).
- 2.1.3 Vir bogenoemde teensprekende harmonisering gebruik die Sinode funksionele en kerkhistoriese argumente (vgl. :104(a)). Indien die Skrifbeginsel en konsekwente denke aangewend is om te bepaal wat in erediensgezing gesing mag word en wat nie, sou dit tot 'n Skrifbegronde besluit gelei het. So 'n Skrifbegronde besluit sou vir die kerke destyds en in die toekoms duidelike en gesagvolle aanwysing oor die kerklied gegee het. Die Sinode van 1913 het nagelaat om die Skrif duidelik te laat spreek (die Sola Scriptura-beginsel).
- 2.1.4 Sinode 1913 het met die besluit inderdaad 'n ander beginsel en evaluering neergelê, (klaarblyklik onbewus):  
Skrifgetroue liedere soos vergestalt in die Twaalf Artikels (deurgetrek na Skrifgetroue gebede (vgl. Psalmboek 1987:673 e.v.) en Skrifgetroue profesieë (Woordbediening) in die erediens, is God net so lofwaardig as die gebruiklike geëvalueerde en aanvaarde Skrifberyminge. Vergelyk ook hierin Skrifberyming 26:11.  
Skrifberyming 6 is 'n voorbeeld van 'n kombinasie tussen 'n Skrifberyming en 'n Skrifgetroue lied aangesien dit elemente van beide bevat.

## 2.2 Teen besluit Nasionale Sinode 1997

2.2.1 Net soos die besluit van 1913 verwerp die Sinode van 1997 die Beskrywingspunt van die Suidelike Partikuliere Sinode tot uitbreiding van KO, art. 69, sonder om die Skrif te laat spreek. Die Skrifmotivering wat aangevoer is, is nie geweeg, aanvaar of verwerp nie. Doodeenvoudig en gemaklik word teruggegryp na die tradisionele uitspraak “Die lieder wat die Here ons in sy Woord gegee het, is in die kerke die beste en voldoende”. Sonder om Skrifgronde te weeg. Waarop is hierdie “motivering” begrond? Waar is dit in die Woord van God te vind? Na watter Skrifuitsprake het die Sinode geluister? Die Beskrywingspunt van die Suidelike Partikuliere Sinode wat voor die Sinode gedien het, stel die ses motiveringe met die nodige Skrifbegronde (eksegese ingesluit). Hierop word geen antwoord gegee nie.

2.2.2 Veral Motivering 1.4 in die Beskrywingspunt van die Suidelike Part. Sinode (Acta 1997:808) kan nie sonder meer blywend geïgnoreer word nie. Dit lui o.m. soos volg:

“Die Ou Christelike kerk het soos dit in die NT gereflekteer word, stellig nie net die OT Psalms gesing nie. In Ef 5.19 en Kol 3.16 word psalms (psalmos), lofsange (humnos) en ander geestelike lieder (ooidê) genoem ... Kerksang is hier ter sprake. (Die woord “psalmos” kan nie beperk word tot die bekende Psalms van die OT nie, aangesien lofliedere wat spontaan in die gemeente ontstaan het (1 Kor 14:15) “psalmos” heet (vgl. Versteeg J.P.: “Oog vir elkaar”). Die NT bied inderwaarheid verskeie voorbeelde van Himniese gedeeltes. Een hiervan (is) Fil:6-11) ... Ander voorbeelde ... Kol 1:15-20, 1 Tim 3:16 (en) 2 Tim 2:11-13.

## 2.3 Teen besluit Nasionale Sinode 1913 en 1997

### 3. Versoek

3.1 Die Sinode word versoek om tydens sy vergadering genoemde Beskrywingspunt - saamgelees met hierdie Beswaarskrif, vanweë die gebreke in sy besluit – weer in oorweging te neem en aan die hand van die Skrif (as norma normans) ‘n duidelike rigtinggewende besluit te neem.

## G. KOMMISSIERAPPORT

### 1. Opdrag

Beswaarskrif Part. Sinode Wes-Transvaal teen besluit Nasionale Sinode 1997, art. 23.6 oor moontlike uitbreiding van KO, art. 69.

Beswaarskrif van Part. Sinode Noord-Transvaal teen besluite van Nasionale Sinode 1913 en 1997 oor liturgiese lieder en ‘n versoek as konsekwensie.

**Besluit:** Kennis geneem.

### 2. Werkswyse

Eers word Noord-Transvaal se Beswaarskrif teen Sinodebesluit 1913 aan die orde gestel, daarna Noord-Transvaal se Beswaarskrif teen Sinodebesluit 1997, en laastens Wes-Transvaal se Beswaarskrif teen Sinode besluit 1997.

**Besluit:** Kennis geneem.

### 3. Beswaarskrif teen besluit 1913

3.1 Besluit waarteen beswaar gemaak word

3.1.1 Redaksie van besluit:

Die Beswaarskrif haal art. 134 as besluit aan. Dit was egter nie die finale redaksie van die besluit nie. Die finale redaksie is nie in art. 134 te vind nie, maar in art. 143:

“De Kommissie, genoemd in Art. 134 brengt de nieuwe lezing ter tafel van het aldaar genomen besluit, dit wordt nu vasgesteld, as volgt:

In de Gereformeerde Kerk (Gemeenten) van Zuid-Afrika zullen bij de openbare godsdienst gezongen worden alleen die 150 Psalmen Davids, de 12 Artikelen des Geloofs en de Gezangen, waarvan de tekst in Gods Woord staat uitgedrukt, te weten: De 10 Geboden, ‘t Onze Vader en de Lofzangen van Maria, Zacharias en Simeon.”

#### 3.1.2 Beredenering

3.1.2.1 Die feit dat Noord-Transvaal ‘n nie-finale redaksie van die besluit aanhaal, raak nie die wese van hulle beswaar nie.

3.1.2.2 Sinodebesluit stel 3 kategorieë liedere vir gebruik in die erediens:

- de 150 Psalmen Davids
- de 12 Artikelen des Geloofs
- de Gezangen waarvan de tekst in Gods Woord staat uitgedrukt

Die Sinode het dus besluit dat benewens Skrifliedere ook 'n Belydenislied gesing kan word.

### **3.2 Gronde vir beswaar**

3.2.1 Gronde 2.1.1 - 2.1.3.

Die Beswaarskrif slaag nie in sy motivering om aan te toon dat die besluit 'n teenstrydigheid bevat nie. Daar is geen teenstrydigheid nie maar twee beginsels, nl enersyds slegs liedere waarvan die teks in die Skrif te vind is, en andersyds 'n "goedgekeurde homologia". Die Beswaarskrif het gelyk dat die Sinode 1913 hierdie ander beginsel sonder Skrifgronde invoer.

3.2.2 Grond 2.1.4

Sinode 1913 het met hierdie besluit inderdaad 'n tweede beginsel vir die eredienslied aangelê.

**Besluit:** Kennis geneem.

### **3.3 Bevinding:**

Die Beswaarskrif word gehandhaaf.

**Besluit:** Goedgekeur.

## **4. Beswaarskrif teen besluit 1997**

4.1 Besluit waarteen beswaar gemaak word

**Besluit:** Kennis geneem.

4.1.1 Aanbeveling: Die Sinode neem kennis

**Besluit:** Goedgekeur.

### **4.2 Gronde vir beswaar**

4.2.1 Beredenering:

Die Beswaarskrif toon aan dat Sinode 1997 volgens die genotuleerde motivering van sy besluit nie 'voldoende' ingegaan het op die eksegetiese en praktiese beredenering van die Beskrywingspunt nie.

**Besluit:** Kennis geneem.

### **4.3 Bevinding**

Die Beswaarskrif word gehandhaaf

**Besluit:** Goedgekeur.

## **5. Beswaarskrif teen besluit 1997:809, art.23.6**

5.1 Besluit waarteen beswaar gemaak word

**Besluit:** Kennis geneem.

5.1.1 Aanbeveling: Die Sinode neem kennis van punte 1-3.

**Besluit:** Goedgekeur.

### **5.2 Grond vir beswaar**

5.2.1 Beredenering:

Die Beswaarskrif toon aan (3.1-3.7) dat Sinode 1997 volgens die genotuleerde motivering van sy besluit nie "voldoende" ingegaan het op die eksegetiese en praktiese beredenering van die Beskrywingspunt nie.

**Besluit:** Kennis geneem.

### **5.3 Bevinding**

Die Beswaarskrif word gehandhaaf

**Besluit:** Goedgekeur.

## 6. Aanbeveling

6.1 Die Sinode versoek die Deputate Liturgiese Sake om besluit Nasionale Sinode 1913 (art. 143, p.48) en besluit Nasionale Sinode 1997 (art. 23.6, p.809) in die lig van die Beswaarskrifte en die Beskrywingspunt van Suidelike Part. Sinode (Acta 1997:807-809) in studie te neem, met Rapport aan die Sinode van 2003.

**Besluit:** Goedgekeur.

6.2 Die Deputate word versoek om ook die Minderheidsrapport van Liturgiese Kommissie 1 in hulle studie te verreken.

**Besluit:** Goedgekeur.

## 22.5 BESKRYWINGSPUNT PARTIKULIERE SINODE NOORD-TRANSVAAL OOR “NUWE” PSALMOMDIGTING (Artt.109, 253)

A. Oudl. N.G. Sarkady stel die Beskrywingspunt.

B. **Besluit:** Die Beskrywingspunt word verwys na Kommissie Liturgies 2.

C. Ds. G.C. Verhoef stel die Kommissierapport.

### D. BESKRYWINGSPUNT

Die Nasionale Sinode 2000 spreek hom uit oor die “nuwe” Psalmomdigting, in die opsig dat die Sinode 2000 D.V. te Potchefstroom nie ‘n finale besluit neem ten aansien van die goedkeuring, aanvaarding en invoering van die “nuwe” Psalmomdigting nie totdat alle Psalms deur die Deputate voorgelê is vir beoordeling deur die kerke.

### Motivering

1. Die werk aan die omdigting het reeds ver gevorder. Dit is bekend dat meer as 100 Psalms reeds deur T.T. Cloete en enkele andere voltooi is. Steeds kon die kerke nie hiervan kennis neem nie en moet daar gewag word vir ‘n Rapport D.V. by Sinode 2000. Dit terwyl die ander meewerkende kerkrade, met name die Ned. Geref.Kerk en die Ned. Hervormde Kerk reeds op verskeie wyses die Psalmomdigtings in eie geleedere beskikbaar gestel, gesing en selfs bespreek het.
2. Dat dit bekend is dat die doel is om die omdigting teen 2001 te druk en beskikbaar te stel. Dit beteken dat die Gereformeerde Kerke ‘n volmag aan Deputate moet verleen om die werk af te handel terwyl ‘n selektiewe fraksie van die werk vir beoordeling aan die Sinode voorgehou word. Deputate tree namens die kerke in die Interkerklike Psalmkommissie op om met die werk te help, maar Deputate kan nie namens die kerke ‘n besluit neem nie. ‘n Volmag kan nie verleen word in so ‘n belangrike saak nie. Omdat die invoering van ‘n nuwe omdigting veral die Gereformeerde Kerke as Psalmsingende kerk raak, is dit noodsaaklik dat alle kerke, en nie bloot ‘n steekproef van kerke soos deur die Deputate bepaal nie, voor die finale besluit van goedkeuring deur ‘n Sinode ten minste alle Psalms ter insae moet hê. ‘n Sinode kan nie slegs ‘n gedeelte van die Psalms beoordeel en daarmee ‘n hele beryming/omdigting aanvaar en invoer nie.
3. Daar die “nuwe” omdigting radikaal verskil van die 1937 Totius-beryming sou dit die juiste weg wees om openheid na die kerke toe te bevorder en is daar geen rede waarom die kerke nie volledig van die omdigting kennis mag neem nie.

**Besluit:** Aan die Beskrywingspunt word gevolg gegee deur die besluit wat die Sinode reeds geneem het: *Dat die kerke die nuwe Psalmberymings ter insae kry vir beoordeling en kommentaar deur die nuwe Deputate.*